

## **DECRETU..../....., de ... del ....., pol que se crea y regula la Rede de Normalización Llingüística**

### **PREÁMBULU**

La collaboración ente l'Alministración del Principáu d'Asturies y los conceyos asturianos demostró l'aciertu y la eficacia d'una xestión averada a la ciudadanía, tamién n'ámbitu de la normalización llingüística.

L'Estatutu d'Autonomía d'Asturies, aprobáu por Llei Orgánica 7/1981 de 30 d'avientu, pide nos sos artículos 4 y 10.21<sup>a</sup> fomentar l'usu y promoción de les llingües propies, la so difusión y la so enseñanza. Nun se ciñe namás a regular la investigación o la protección del so patrimoniu llingüísticu, sinón qu'esixe una acción dinamizadora, de recuperación efectiva. Faculta a les persones falantes d'estes llingües a medrar vitalmente y a desenvolvese cultural y profesionalmente nelles si asina lo quieren. A aquelles otres persones que por razones particulares o familiares nun disfrutaron de la tresmisión xeneracional y nun les falen, anímales pa que les apriendan y puedan usales si esa ye la so voluntá.

Les corporaciones locales y mancomunidaes, reconociendo la realidá llingüística plural y asumiendo un usu institucional y públicu d'eses llingües propies, empezaron a implicase nuna acción positiva de política llingüística, al amparu de la Llei 1/98, de 23 de marzu, d'Usu y Promoción del Bable/Asturianu. Esta llei refierse nel so artículu 8 al papel que tienen de desempeñar los conceyos p'asegurar la efectividá del exerciciu de los derechos llingüísticos de la ciudadanía residente n'Asturies. Dellos conceyos yá desenvolvieren, dende una década enantes, un trabayu pioneru y meritoriu n'ámbitu de la cultura d'espresión asturiana.

A partir del 2001, por iniciativa de los mesmos conceyos y de delles mancomunidaes, y cola ayuda y collaboración nos más de los casos de l'Alministración autonómica, surdieron a lo llargo de tola xeografía asturiana delles unidaes alministratives que s'ocupen de la normalización de les llingües propies y dan cobertura, nesti momentu del so percorríu históricu, a cuasi la metá de los conceyos del Principáu y a alreod de dos tercios de la so población. Nel 2020 incorporóse la Universidá d'Uviéu, abriendo camín a otres instituciones o entes del Principáu d'Asturies que puen atopar nesta clas de servicios el meyor preséu normalizador, de dinamización y asesoramientu llingüísticu, de traducción o interpretación si fore menester.

La intención del Gobiernu d'Asturies ye reforzar entá más el papel normalizador d'estos servicios, en collaboración coles corporaciones locales, mancomunidaes, fundaciones o instituciones de les que dependen. Como serviciu públicu que dan, quier dir ameyorándose la so dotación económica y de personal na midida na que dexen los presupuestos, comprometiéndose a facer un esfuerciu más grande de coordinación ente los servicios, d'estabilización, desenvolvimientu y medría, de manera que puedan cumplir col so cometíu dinamizador de la política llingüística que se promueve.

El primer pasu nesa xera de refuerzu y afitamientu de la collaboración ente'l Principáu y les demás entidaes participantes ye dar carta de naturaleza a la Rede de Normalización Llingüística (d'equí p'arriba, tamién REDE), un instrumentu que yá funciona de manera non reglamentada, como plataforma collaborativa de trabayu y de comunicación interna ente'l personal téunicu de los servicios. Esti decretu, un pasu previu al establecimientu d'un consorciu futuru de política llingüística, crea esa REDE y regula la so composición, la so organización, les sos competencias y el so funcionamientu. Cúntase tamién, de cara a un futuru bien cercanu, incorporar aquelles entidaes privaes ensin ánimu

d'arriquecimientu (cámares de comerciu, fundaciones, asociaciones empresariales, de consumidores, consejos reguladores, etc.) que lo soliciten.

La REDE ta llamada a desempeñar un papel fundamental na regulación territorial de la política llingüística, na creación de servicios normalizadores nuevos, nel caltenimientu de los que yá tán funcionando y na coordinación y desenvolvimientu de l'actividá de toos ellos, porque va facer posible una xestión más eficaz y eficiente nos dos niveles de trabayu que se proponen: per una parte, nel de la representación institucional, al traviés de la participación de los cargos electos; y, per otra, nel nivel qu'axunta al personal técnico. Amuésase asina la REDE como un instrumentu amañosu pa llevar a cabu la cooperación económica, técnica y alministrativa nel desenvolvimientu d'una política llingüística afayadiza que fomente con eficacia y cercanía la protección, l'usu y la promoción de les llingües propies.

Esti decretu axústase a los principios de bona regulación recoyíos n'artículo 129.1 de la Llei 39/2015, de 1 d'ochobre, del Procedimientu Alministrativu Común de les Alministraciones Públiques. En particular, esta norma ye eficaz al ser un decretu l'instrumentu afayadizu pa la creación y regulación de la REDE, como órganu colexáu, resultando proporcionada al cumplimientu d'esta finalidá. Amás, ayuda a la satisfacción del principiu de la seguridad xurídica na organización de l'Alministración autonómica, faciendo posible un conocimientu adecuáu de la so estructura y funcionamientu, y satisfái'l principiu d'eficiencia al nun imponer cargues alministratives escesives o accesories.

Esti decretu consta de trés capítulos, una disposición adicional y dos disposiciones finales. El capítulo I recueye delles disposiciones xenerales, ente les que s'atopen la naturaleza, la finalidá y el réxime xurídicu de la REDE y el so ámbitu suxetivu d'aplicación, por mentar dalgunes. El capítulo II regula la composición y la organización de la REDE. Y el capítulo III desenvuelve les normes relatives a les sos competencias xunto a otres disposiciones necesaries pal so funcionamientu afayadizu.

Na so virtú, a propuesta de la consejera de Cultura, Política Llingüística y Turismu, previu alcuertu del Conseyu de Gobiernu na so xunta de fecha .....

## **DISPONGO**

### **CAPÍTULO I**

#### **DISPOSICIONES XENERALES**

##### **Artículo 1. Oxetu.**

Esti decretu tien por oxetu crear la Rede de Normalización Llingüística y regular la so composición, la so organización, les sos competencias y el so funcionamientu.

##### **Artículo 2. Definiciones.**

A los efectos d'esti decretu, entiéndese por:

a) Llingües propies o tradicionales d'Asturies: la llingua asturiana y el gallego-asturianu.

b) Servicios de normalización llingüística (SNL): unidaes alministratives d'una Alministración pública, d'una entidá del sector públicu institucional o d'una entidá privada ensin ánimu d'arriquecimientu, encargaes de planificar, executar y asesorar en materia de política llingüística a la entidá de la que dependen. Puen recibir denominaciones distintes: Estaya, Oficina, Área, etc.

c) Planes de normalización llingüística: preseos de planificación que, a partir del análisis y de les posibilidaes del contestu y del usu real de les llingües propies, y de los oxetivos xenerales en materia de política llingüística de cada Alministración pública o entidá, dexen establecer unes llinies d'actuación d'estensión del usu d'esos llingües na actividá académica, alministrativa y social, especificando la temporalización del procesu, les estratexes d'actuación, los responsables, los recursos y los sistemes d'evaluación.

d) Proyeutu, actividá o actuación con impactu llingüísticu: cualquier acción que provoqe una alteración positiva na situación sociollingüística d'un territoriu o d'un sector concretu de la sociedá, dende la perspectiva del procesu de normalización llingüística de les llingües propies.

### **Artículu 3. Naturaleza y finalidá.**

1. La REDE constitúyese como un órganu colexáu, d'adhesión voluntaria, de participación institucional y d'impulsu, creáu pa coordinar los proyectos, les actividaes y les actuaciones de los SNL nel Principáu d'Asturies, y orientáu a dinamizar l'usu de les llingües propies.

2. La REDE tien autonomía y independencia plena nel cumplimientu de los sos fines.

3. El fin principal de la REDE ye potenciar los Servicios de Normalización Llingüística yá existentes y favorecer l'impulsu de la so creación naquelles Alministraciones públiques o entidaes que nun dispongan d'ellos, cola mira d'aumentar los espacios d'usu de les llingües propies d'Asturies n'ámbitos averaos a la ciudadanía como ferramienta imprescindible pa la so normalización social.

### **Artículu 4. Réxime xurídicu.**

La REDE va rexise per esti decretu. Va tener calter supletoriu, al respective de lo non previsto nesti decretu, la normativa sectorial en materia de política llingüística del Principáu d'Asturies y la llexislación aplicable en materia de procedimientu alministrativu y réxime xurídicu del sector públicu.

### **Artículu 5. Adscripción.**

La REDE adscríbese orgánicamente a la consejería competente en materia de política llingüística, que-y va apurrir los medios materiales y humanos que precise nel exerciciu de les sos funciones, dientro de les sos posibilidaes presupuestaries.

### **Artículu 6. Ámbitu suxetivu d'aplicación.**

1. Les disposiciones d'esti decretu van aplicase, con respetu plenu a la so autonomía alministrativa, organizativa y funcional, a los SNL yá creaos o que puedan crease nel territoriu del Principáu d'Asturies, promovíos por cualesquier Alministraciones públiques o pol sector públicu institucional, integráu polos organismos y entidaes recoyíos n'artículu 2.2 de la Llei 40/2015, de 1 d'ochobre, del Réxime Xurídicu del Sector Públicu, desque formalicen, d'alcuertu col artículu 23 apartaos 1 y 2, la so adhesión voluntaria a la REDE.

2. Les entidaes privaes ensin ánimu d'arriquecimientu que creen un SNL tamién van poder incorporase a la REDE, cuando asina lo soliciten col mesmu procedimientu d'adhesión.

3. En cualquier momentu y ensin falta d'alegar causa nenguna, les Alministraciones públiques o entidaes que figuren adheríes a la REDE van poder dase de baxa na mesma col procedimientu dispuestu n'artículu 23 apartaos 3 y 4.

### **Artículu 7. Sede.**

Les sesiones de la REDE van poder celebrase en cualquier conceyu de la comunidá autónoma, ensin perjuiciu de que normalmente se desenvuelvan onde tea la sede de la consejería con competencias en materia de política llingüística.

## **Artículo 8. Presupuestos de base.**

1. La llingua asturiana, igual que'l gallego-asturianu nel so ámbitu territorial, ye un mediu d'espresión colectiva de la ciudadanía d'Asturies y un elementu qu'ayuda a definir y a crear la identidá d'una comunidá. Ye amás un fechu cultural y un bien esencial del patrimoniu cultural qu'hai que protexer y promover.

2. La comunidá autónoma asumió'l deber y la responsabilidá de garantizar la prestación regular del serviciu públicu de fomentu y protección de les llingües propies y la so normalización social, bien realizándola por sí o asegurando la so realización por terceros.

3. La creación d'un sistema de trabayu en rede de los SNL, con respetu plenu a l'autonomía de cada entidá, dexa aprovechar la ventaya qu'ufierta'l trabayu cooperativu p'ameyorar la cohesión territorial.

4. Nes sos actuaciones y nel marcu de les sos competencias, la REDE va aplicar la doctrina de la Carta Europea de les Llingües Rexonales o Minoritaries fecha n'Estrasburgo'l 5 de payares de 1992 y ratificada por España pente medies d'instrumentu dau pol Gobiernu'l 2 de febreru del 2001.

## **Artículo 9. Principios informadores.**

Los principios informadores que son d'aplicación nel desenvolvimientu d'esti decretu son estos:

a) Respetu institucional, cola mira de llograr la collaboración máxima na actuación de les entidaes participantes.

b) Sofitu mutuú, garantizando que la entidá más averada a la ciudadanía pueda dar el serviciu que se demanda, ensin que la capacidá técnica escasa pueda ser un inconveniente pa eso.

c) Voluntariedá, porque l'adhesión al sistema de trabayu en rede ye voluntaria.

d) Calidá, qu'incluye la determinación d'unos estándares mínimos de calidá de los SNL adheríos a la REDE.

e) Evaluación, con voluntá d'analizar la tipoloxía y l'impactu de les acciones que se realicen por cada SNL nel so ámbitu, amás de la so repercusión global.

f) Eficiencia máxima con economía de medios cola mira d'aforrar gastos innecesarios o duplicaos.

g) Racionalidá, simplicidá y tresporencia nes actuaciones.

## **Artículo 10. Midíes d'acción positiva y derechos llingüísticos.**

La REDE va adoptar les midíes d'acción positiva que resulten necesaries pa facer efectivos estos derechos de la ciudadanía asturiano reconocíos na Llei 1/1998, de 23 de marzu, d'Usu y Promoción del Bable Asturianu al traviés de los SNL:

a) El derechu a que l'asturianu (y nel so ámbitu'l gallego-asturianu) goce de protección como llingua tradicional d'Asturies y se promueva'l so usu, difusión y enseñanza, amás del fomentu de la so recuperación y desenvolvimientu.

b) El derechu de la ciudadanía asturiano a conocer y usar les llingües propies, y establecer los medios que faigan efectivos esos derechos ensin discriminación nenguna por esi usu.

c) El derechu al exerciciu de los derechos llingüísticos qu'esta llei otorga a la ciudadanía asturiano, fomentando en coordinación con otres Alministraciones públiques y coles entidaes de los sos respectivos sectores públicos la realización de planes específicos de normalización llingüística pal usu efectivu de les llingües propies, que pa esi fin van poder financiase los servicios y actuaciones que foren menester.

d) El derechu a que se realicen cuantos proyectos, actividaes o actuaciones d'impactu llingüísticu seyan posibles pa garantizar y normalizar socialmente l'usu de les llingües propies.

e) El derechu a establecer un marcu de reconocencia y de respaldu institucional abondo pa garantizar el derechu a la investigación en materia llingüística propia de la comunidá autónoma, inclusive en collaboración con otres instituciones públiques o privaes.

f) El derechu a gozar por toles persones que s'atopen na comunidá autónoma del Principáu d'Asturies d'una ufierta cultural amplia creada n'asturianu y gallego-asturianu, y que fomente l'intercambéu cultural con otres cultures.

## CAPÍTULO II

### COMPOSICIÓN Y ORGANIZACIÓN

#### **Artículo 11. Composición.**

La REDE va tar constituyida por estos órganos:

- a) Conseyu de la Rede
- b) Presidencia
- c) Vicepresidencia
- d) Vocalíes
- e) Secretaría
- f) Comisión Técnica

#### **Artículo 12. El Conseyu de la Rede.**

1. El Conseyu de la Rede compónse de les persones qu'ostenten la presidencia, la vicepresidencia, les vocalíes nun númberu illimitáu de persones (tantes como Alministraciones públiques o entidaes con SNL propiu, creáu y en funcionamientu s'adhieran a la REDE) y la secretaría del órganu.

2. Pa quedar válidamente constituyíu, va ser abondo cola asistencia de la presidencia o la vicepresidencia, asistíos de la persona qu'ostente la secretaría o quien la supla, y una quinta parte del númberu total de vocalíes adheríes a la REDE.

3. Va poder asistir a les sesiones del Conseyu de la Rede cualquier persona que considere necesaria la presidencia de la REDE en condición de persona collaboradora, con voz pero ensin votu.

4. El Conseyu de la Rede va exercer toles competencies que-y asignen nesti decretu, amás de les que-y atribuyan na so normativa de desenvolvimientu.

5. Van ser les sos atribuciones:

- a) Velar pol cumplimientu de los fines d'esti órganu.
- b) Aprobar el reglamentu de réxime interior.
- c) Aprobar la memoria anual.
- d) Adoptar alcuerdos por asentimientu o por votación.
- e) Ellaborar informes y proponer recomendaciones o otres propuestes de desenvolvimientu de bones práctiques empobinaes a los SNL.
- f) Proponer a la consejería competente en materia de política llingüística cuantes actuaciones o midíes paezan oportunes pa promover la normalización del usu de les llingües propies.
- g) Collaborar, nes materies que-y son propies, con órganos de naturaleza análoga.

#### **Artículo 13. Presidencia.**

1. La presidencia de la REDE va ostentala la persona titular de la consejería con competencies en materia de política llingüística.

2. Corresponde a la presidencia:

- a) Ostentar la representación del órgano.
- b) Planificar l'actividá xeneral d'esti órgano afitando les sos llinies principales d'actuación.
- c) Alcordar la convocatoria de les sesiones ordinaries y extraordinaries y poner el orde del día teniendo en cuenta, nel so casu, los pidimientos de los demás miembros formulaos y presentaos d'aluerdu colo dispuesto n'artículu 21.2.
- d) Presidir les sesiones, moderar el desenvolvimientu de los debates y suspendelos por causes xustificaes.
- e) Visar les actes y certificaciones de los alcuerdos adoptaos.
- f) Dirimir la votación en casu d'empate, con votu de calidá.
- g) Tomar determinos sobre l'adhesión o separación de los miembros de la REDE.
- h) Solicitar la presencia y participación nes sesiones del Conseyu de la Rede de persones colaboradores que, nun perteneciendo a esti Conseyu, se precisen p'asesoramientu o trabayos determinaos.
- i) Delegar na vicepresidencia les sos funciones.
- j) Exercer cuantes otres funciones seyan inherentes a la presidencia d'un órgano colexáu.

#### **Artículu 14. Vicepresidencia.**

1. La vicepresidencia va ostentala la persona titular de la dirección xeneral con competencia en materia de política llingüística.

2. Corresponde a la vicepresidencia:

- a) Sustituyir a la persona titular de la presidencia nos supuestos d'ausencia, enfermedá o otu motivu llexítimu.
- b) Asumir les funciones de la persona titular de la presidencia por delegación de la mesma.
- c) Participar nes sesiones con voz y votu.
- d) Exercer cuantes otres funciones seyan inherentes a la vicepresidencia d'un órgano colexáu o que-y atribuyan la presidencia o'l Conseyu de la Rede.

#### **Artículu 15. Vocalíes.**

1. Van ser vocalíes de la REDE les persones titulares de la presidencia, alcaldía, dirección, xerencia o cargu de naturaleza asemeyada de les Alministraciones públiques o entidaes que s'adhieran.

2. Les persones titulares de les vocalíes van poder delegar la so participación nes sesiones naquelles persones que les sustituyan en función de les sos respectives normes d'organización y funcionamientu, siempre qu'esa delegación se comuniquen con venticuatro hores d'antelación a la secretaría de la REDE.

3. Corresponde a caúna de les vocalíes:

- a) El derechu d'asistir a les sesiones.
- b) El derechu de participar nes sesiones con voz y votu.
- c) El derechu a recibir información y obtener cuantos datos y documentos se consideren precisos pal exerciciu de les sos funciones.
- d) El derechu a proponer na forma que s'estableza asuntos a tratar nel orde del día de les xuntes, d'aluerdu colo dispuesto n'artículu 21.2.
- e) El derechu a formalizar cola so firma la participación de les Alministraciones públiques o entidaes que representen nos alcuerdos adoptaos pol Conseyu de la Rede coles previsiones recoyíes n'apartáu 5 del artículu 22.

## **Artículo 16. Secretaría.**

1. La persona qu'exerza la secretaría de la REDE va nomase por resolución de personar titular de la presidencia ente persones empleaes públiques adscrites a la consejería competente en materia de política llingüística.

2. Na mesma resolución en que s'alcuerde'l so nomamientu, va designase una segunda persona empleada pública d'esa consejería, que va poder actuar en casos d'ausencia xustificada de la persona titular de la secretaría.

3. L'ausencia de la persona titular de la secretaría o de quien la sustituya nun va quitar pa la constitución válida del Conseyu de la Rede, exerciendo nesos casos les funciones de fedatariu o fedataria la persona vocal presente de menor edá, que va caltener el so derechu al votu.

4. Correspuende a la secretaría:

- a) Asistir a les xuntes del Conseyu de la Rede con voz pero ensin votu.
- b) Efectuar la convocatoria de les sesiones de la REDE por orde de la presidencia, amás de les citaciones a les vocalíes.
- c) Recibir los actos de comunicación de les vocalíes, de la Comisión Técnica y de los miembros de los grupos de trabayu.
- d) Preparar les propuestes d'alcuerdu y la redacción de les actes.
- e) Ellaborar la memoria anual.
- f) Emitir certificaciones de los alcuerdos adoptaos.
- g) Coordinar la Comisión Técnica.
- h) Facilitar a les vocalíes de la REDE la información y documentación necesario pal exerciciu de les funciones.
- i) Organizar les xeres alministratives pal funcionamientu normal de la REDE.
- j) Cuantes otres funciones seyan inherentes a la secretaría d'un órganu colexáu.

## **Artículo 17. Comisión Técnica.**

1. La Comisión Técnica de la REDE va tar constituyida pol personal técnico de los SNL que designe cada vocalía, y pol personal técnico de l'Alministración del Principáu que designe la presidencia de la REDE, ensin un número fixu nin preestablecíu.

2. Va aconceyar baxo la coordinación de la secretaría de la REDE, que va poder delegar esta coordinación nuna persona empleada pública adscrita a la consejería competente en materia de política llingüística.

3. La so actuación y trabayu quier ser el preséu de dinamización y desenvolvimientu de les funciones de los SNL. Correspuénde-y la realización d'estudios, proyectos, actividaes, programes, planes y propuestes en materia de normalización llingüística, teniendo que dar cuenta de los sos trabayos al Conseyu de la Rede al traviés de la secretaría o d'un de los técnicos o técnicas que forme parte d'esta Comisión Técnica.

4. La Comisión Técnica va poder formar los grupos de trabayu que-y paezan necesarios. Estos grupos van constituyise pol simple compromisu de los sos participantes, cola mira d'ellaborar propuestes concretes qu'han unviase al Conseyu de la Rede, pente medies de la secretaría de la REDE. Van disolvese desque rematen el trabayu que motivó la so creación o cuando asina lo decida'l Conseyu de la Rede, a iniciativa propia o a pidimientu de quien participen nesi grupu de trabayu.

## **Artículo 18. Nomamientu, retribución y cese de los miembros del Conseyu de la Rede.**

1. Les persones que formen parte del Conseyu de la Rede sonlo por razón del so nomamientu como titulares de la consejería, dirección xeneral, presidencia, alcaldía, dirección, xerencia o cargu de naturaleza asemeyada de les Alministraciones públiques o entidaes que s'adhirieren a la REDE.

2. Nun van percibir retribución nenguna pola so participación.
3. Son causes de cese:

a) La renovación del cargu por cualquier causa que suponga la so destitución na Alministración pública o entidá que representen o pola que participen nesti Conseyu de la Rede.

- b) La baxa de la entidá a la que representen na REDE.
- c) El so cese voluntariu.
- d) El so fallecimientu.

### **Artículo 19. Nomamientu, retribución y cese de los miembros de la Comisión Técnica.**

1. Les persones que formen parte de la Comisión Técnica sonlo por razón de la so designación poles Alministraciones públiques o entidaes adheríes a la REDE.

2. Nun van percibir retribución nenguna pola so participación.
3. Son causes de cese:

a) El determin de l'Alministración pública o entidá d'apartar a cualquiera de los sos miembros d'esta Comisión Técnica, ensin falta de motivación nin xustificación nenguna.

- b) El so cese voluntariu.
- c) La baxa de la entidá a la que representen na REDE.
- d) El so fallecimientu.

## **CAPÍTULO III**

### **COMPETENCIES Y FUNCIONAMIENTU**

#### **Artículo 20. Competencies.**

Correspuenden a la REDE estes competencies:

a) Asesorar a les Alministraciones públiques o entidaes en materia regulatoria de los SNL.

b) Promover la creación de servicios de calidá qu'aumenten la presencia de les llingües propies na vida social d'Asturies, tanto nes alministraciones o entidaes adscrites como nes empreses o nel texiu asociativu, fomentando y promoviendo l'asesoramientu llingüísticu, la traducción, cursos y sesiones formatives, corrección de testos o actividaes d'ociu y cultura.

c) Asesorar a les corporaciones locales sobre la ellaboración y promulgación d'ordenances en materia de llingües propies d'alcuertu cola llegalidá vixente.

d) Planificar, xestionar y coordinar la realización de cursos de llingua asturiana y de gallego-asturianu.

e) Asesorar a les entidaes que lo soliciten pa establecer perfiles llingüísticos necesarios en determinaos puestos de trabayu y colaborar nes pruebes o procesos selectivos pa que s'evalúen los conocimientos llingüísticos de les persones aspirantes.

f) Promover la coordinación de les actuaciones de los SNL cola mira de llograr mayor coherencia y collaboración ente estos servicios y ente ellos y l'Alministración autonómica.

g) Proponer acciones p'ameyorar los SNL.

h) Velar pol cumplimientu de la llexislación en materia llingüística poles instituciones participantes, sobre manera pola aplicación práctica de la toponimia oficial.

i) Axuntar información sobre polítiques de normalización llingüística d'otres Alministraciones públiques a los efectos de suxerir actuaciones innovadores y esperimentales n'ámbitu de la promoción del usu de les llingües propies.

j) Realizar el seguimiento y evaluar la ejecución de los planes de normalización lingüística, con la mira de conocer el su desenvolvimientu, valorar los sos resultaos y proponer, nel su casu, los cambeos necesarios.

k) Difundir una imaxe positiva de les llingües propies al traviés de la collaboración na realización polos SNL de programes de dinamización del su usu destinaos a dellos sectores sociales.

l) Analizar y estudiar les necesidaes de los SNL, al respective de la meyora d'empléu del su personal, de la su capacitación profesional y de a la calidá de la su formación.

m) Informar sobre cualquier asuntu qu'en materia de SNL-y puedan someter a valoración los sos miembros o cualquier otra institución pública o privada.

n) Coordinase cola consejería competente en materia educativa pa una mayor implicación social nel procesu d'enseñanza reglada de les llingües propies, con una atención especial a les escuelas d'Educación Infantil, procurando ampliar la ufierta d'actividaes estraescolares o complementaries nestes llingües.

o) Elaborar, aprobar y, nel su casu, publicar, una memoria anual col conteníu establecíu n'artículu 27.

p) Diseñar programes de sensibilización lingüística pal personal de los miembros de la REDE.

q) Promover campañes normalizadores de les llingües propies y entamar conferencies, eventos, meses redondes o cualquier otra actividá dinamizadora pa la su promoción y usu en distintos sectores sociales de la población asturiano y en distintos ámbitos territoriales del Principáu d'Asturies.

r) Xenerar actitúes positives na sociedá pa que l'asturianu y el gallego-asturianu seyan axentes activos y creativos de la vida cultural, social y económica d'Asturies, con atención especial a la mocedá y a la tresmisión xeneracional d'estes llingües propies.

s) Cualquier otra función que se determine pola consejería a la que ta adscrita y que se relacione colos SNL.

### **Artículu 21. Sesiones del Conseyu de la Rede.**

1. La REDE va aconceyar de forma ordinaria polo menos una vez al añu y, de forma extraordinaria, cuando la convoque la presidencia, por iniciativa propia o a pidimientu de polo menos una quinta parte de les sos vocalíes.

2. Les convocatories, tanto ordinaries como extraordinaries, van efectuase pola persona titular de la secretaría por orde de la presidencia, con una antelación mínima de diez díes naturales. A elles ha axuntase l'orde del día y la documentación que fore menester, que va poder complementase como máximu hasta trés díes enantes coles aportaciones efectuaes pa la su inclusión poles vocalíes.

3. Les sesiones van poder ser presenciales o non presenciales. Son sesiones non presenciales les sesiones a distancia onde nun seya menester la presencia física de los sos miembros pa celebrase y que se faigan per medios electrónicos.

4. Va llevantase acta de cada sesión pola persona titular de la secretaría, faciendo constar el sitiu y fecha de la sesión, les persones asistentes a la mesma, l'orde del día propuestu, la documentación apurrío, el conteníu de lo tratao, amás del conteníu de los alcuerdos o propuestes adoptaes.

### **Artículu 22. Alcuerdos del Conseyu de la Rede.**

1. Los alcuerdos del Conseyu de la Rede van poder adoptase por asentimientu o por votación.

2. La votación va ser pública, sacante que por unanimidá del Conseyu de la Rede s'alcuere de la votación secreta.

3. Van entendese adoptaos por asentimientu los alcuerdos que traten sobre propuestes a les que nun formulare oxeciones nenguna persona del Conseyu de la Rede.

4. Los acuerdos restantes han adoptarse con votación, teniendo que s'aprobar por mayoría simple de les persones presentes na sesión en que se voten pa ser adoptaos.

5. Los acuerdos nun van poder tener efectos frente a terceros. Tampoco nun van tener efectos vinculantes pa les vocalíes que los soscriban o participen d'una forma o otra na so aprobación, sacante qu'estos representantes nel Conseyu de la Rede los unvien a les sos respectives Alministraciones públiques o entidaes y éstes los aprueben na forma llegal o reglamentariamente prevista pa l'adopción de los sos propios acuerdos.

6. Nun van poder adoptarse acuerdos sobre materies non incluyíes nel orde del día, nun siendo que tean presentes nesa sesión la metá más ún de los miembros de la REDE y l'acuerdu s'adopte por asentimientu.

7. En tolo non previsto nesti decretu en materia d'adopción d'acuerdos, va tase a la normativa alministrativa sobre funcionamientu d'órganos colexaos.

### **Artículo 23. *Procedimientu d'adhesión y de separación.***

1. La incorporación de miembros nuevos va riquir siempre l'aceptación espresa de los presupuestos xurídicos establecíos nesti decretu pa la REDE.

2. Les Alministraciones públiques o entidaes que quieran adherise han formalizar la so solicitú nel modelu normalizáu que se publica como anexu I. Xunto a la solicitú ha unviase esta documentación:

- a) Aluerdu d'adhesión aprobáu pol órganu competente correspondiente.
- b) Designación de la representación téunica que va participar na REDE.

3. Cualquier miembru de la REDE va poder dase de baxa con una comunicación fidedigna fecha con una antelación mínima de trés meses antes del final de cada exerciciu, ensin perxuiciu de que seya responsable del cumplimientu de les obligaciones concretes asumíes nel exerciciu en cursu.

4. Van ser causes d'esclusión d'un miembru de la REDE:

- a) La estinción o desapareición sobrevenida del SNL d'una Alministración pública o entidá adherida a la REDE, siempre que nun solicitare la baxa enantes.
- b) L'incumplimientu de cualquier otru de los presupuestos xurídicos establecíos nesti decretu pa formar parte de la REDE.

### **Artículo 24. *Reglamentu internu.***

Un reglamentu internu va desenvolver el réxime d'organización y funcionamientu previstu nesti decretu, pudiendo establecese, ente otres disposiciones, un réxime de mayoríes cualificaes pa l'adopción de determinaos acuerdos.

### **Artículo 25. *Collaboración nel suministru d'información.***

Les Alministraciones públiques o entidaes que formen parte de la REDE van colaborar previu requerimientu de la presidencia o de forma periódica nel suministru de toda información y de los datos que seyan menester pal meyor cumplimientu de les funciones d'esti órganu colexáu.

### **Artículo 26. *Tresporencia.***

1. La REDE va publicar de forma periódica y actualizada la información que seya relevante conocer pa garantizar la tresporencia de la so actividá rellacionada col funcionamientu de los SNL y del propiu órganu.

2. Con calter xeneral, va publicase namás aquella información rellacionada cola organización, el funcionamientu y les actividaes públiques d'esos servicios y d'esi órganu, evitando no posible la publicación d'información que contenga datos personales, nun siendo que prevalezca l'interés públicu na so divulgación.

3. Si la información a publicar contuviere datos personales, va ser d'aplicación na forma de publicación d'esa información la normativa existente en materia de protección de datos personales, de manera que s'impida identificar les persones afectaes, sacante que resulte necesario y imprescindible y que, nesi casu, se tenga'l consentimientu espresu de la persona afectada o tea amparao por una norma con rangu de llei.

#### **Artículu 27. Memoria anual.**

1. El Conseyu de la Rede va aprobar y, nel so casu, va publicar una memoria anual que recueya los alcuerdos y les propuestas o otros documentos adoptaos, los trabayos realizaos pola Comisión Técnica y los grupos de trabayu, y toes aquelles actuaciones específiques llevaes a cabu polos SNL que merezan destacase pola so contribución a la normalización llingüística.

2. La memoria va poder contener amás observaciones y suxerencies sobre'l funcionamientu d'esti órganu y el de los distintos SNL qu'ayuden a una meyora nel procesu de normalización llingüística del usu del asturianu y del gallego-asturianu como llingües propies na nuestra comunidá autónoma.

#### **Artículu 28. Financiamientu.**

1. Los gastos derivaos de la constitución, la organización y el funcionamientu de la REDE va sufragalos l'Alministración del Principáu d'Asturies, d'alcuerdu coles sos disponibilidaes presupuestaries, y ensin perjuiciu de l'aportación voluntaria que puedan facer otres Alministraciones y instituciones públiques y privaes.

2. L'Alministración del Principáu d'Asturies va sofitar el funcionamientu de los proyectos, actividaes y actuaciones que desenvuelvan los SNL de les Alministraciones públiques y el so sector públicu institucional, o de les entidaes privaes ensin ánimu d'arriquecimientu que s'incorporen, pente medies de subvenciones nominatives, convenios de collaboración o cualquier otra fórmula de financiamientu específicu que se prevea.

#### **Disposición adicional única. Desenvolvimientu normativu.**

Autorízase a la persona titular de la consejería competente en materia de política llingüística pa dictar cuantes resoluciones seyan necesaries pal desenvolvimientu y execución d'esti decretu. Amás, pente medies de resolución de la persona titular de la consejería con competencia en materia de política llingüística, va poder revisase l'Anexu I, o crease otros nuevos que foren menester pal funcionamientu afayadizu de la REDE.

**Disposición final primera. Segunda modificación del Decretu 86/2019, de 30 d'agostu, pol que s'establez la estructura orgánica básica de la Consejería de Cultura, Política Llingüística y Turismu.**

Modifícase'l Decretu 86/2019, de 30 d'agostu, pol que s'establez la estructura orgánica básica de la Consejería de Cultura, Política Llingüística y Turismu, nestos términos.

Únicu. La lletra d) del apartáu 1 del artículu 1 pasa a tener esta redacción adicional:

«9. Rede de Normalización Llingüística.»

#### **Disposición final segunda. Entrada en vigor.**

Esti decretu va entrar en vigor a los venti díes de la so publicación nel *Boletín Oficial del Principáu d'Asturies*.